

Carta najndyee na seicwanom Pablo na m'aⁿ nn'aⁿ

Tesalónica

Matseiljeii Pablo cwii carta ñequio nc'iaaⁿaⁿ

1 ¹ Ja Pablo matseiljeiya cartawaañe, ñequio Silvano ñ'eⁿ Timoteo, matseicwanoⁿya juuna' ndaa' 'o tmaaⁿ nn'aⁿ na macwji' Ty'oots'om cwentaaⁿaⁿ na m'aⁿyo' tsjoom Tesalónica, 'o na cwila'xmaⁿyo' cwentaa' Tsotyaaya Ty'oots'om ndo' mati Ta Jesucristo. Quiana na nnto'ñoom'yo' naya na cwila'xmaⁿna ndo' na nda'yo' na tjaa ñomtiuu c'om'yo' jo ndaana.

Nn'aⁿ Tesalónica la'xmaⁿna na cwila'yu'ya n'omna

² Ñenquii'cheⁿ na cwiñe'quiaayâ na quianl'uaa' Ty'oots'om cantyja 'naⁿyo' na cha'tsondyo'. Cwijaañjoom' n'ooⁿyâ 'o quia na cwilanaaⁿyâ nnoom. ³ Tyootsuu' n'ooⁿyâ 'o jo nnom nquii Tsotyaaya na jeeⁿ xcwee' n'om'yo' na cwila'yu'ya n'om'yo'. Jo' chii jndye ts'iaaⁿ na ya cwileitquioo' na cwil'a'yo'. Ndo' jeeⁿ cwiqueⁿya n'om'yo' na cwitei'jndeiyoy' nc'iaa'yo' nc'e na wi' n'om'yo' joona. Ndo' tîca'ndye'nc'uaa'ndyo' na wi' na cwi'tjom'yo' nc'e na ntyjaa' n'om'yo' Ta Jesucristo. ⁴ 'O nn'aaⁿya, Ty'oots'om m'aaⁿ na candya' ts'oom 'o, ndo' manquiuuyaayâ na jnda tjeii'ñê 'o cwentaaⁿaⁿ. ⁵ Ee quia tyoñequiaayâ ñ'oom ndaa'yo' na macwji'n'maaⁿñe Ty'oots'om nn'aⁿ, nchii cwe' tomti teil'uena' nc'e ñ'oom na tyolanaaⁿyâ saa nc'e najndeii na matseixmaⁿ Espíritu Santo ndo' na tquiaana' na jla'noⁿyo' na juu ñ'oom'ñeeⁿ ñ'oom na mayuu' jo'. Ndo' ñequio na tyol'uaayâ chiuu na nnteijndeina' 'o.

⁶ Jo' chii mati 'o macwitsantyjo'yo' cha'xjeⁿ na cwil'aayâ. Ndo' maluaa', macwitsantyjo'yo' naxeⁿ nquii Ta Jesucristo. Nc'e jo' na tquiaa Espíritu Santo na jeeⁿ neiⁿyo' meiⁿ wi' ñel'a nn'aⁿ tsjom'yo' jnda na to'ñoom'yo' ñ'oom naya na tyoñequiaayâ ndaa'yo'. ⁷ Ndo' na luaa', tyolaxmaⁿyo' cwii na ma'moⁿna' ndaa nn'aⁿ ts'ondaa Macedonia ñequio Acaya chiuu na nnc'oom'aⁿna. ⁸ Ee na m'aⁿ 'o jnaⁿna' na tjanty'ee ñ'oom naya 'naaⁿ Ta Jesucristo. Ndo' je' tachii macanda ndyuaa'yo' Macedonia ñequio Acaya saa mati jndye joo jnda manquiu nn'aⁿ na cwila'yu'ya n'om'yo' ñequio Ty'oots'om. Jo' chii meiⁿ tacaⁿtina' na nl'uuyâ ñ'oom cantyja 'naⁿyo' ndaa naⁿñeeⁿ. ⁹ Ee manquieeti naⁿñeeⁿ cwila'neiⁿna chiuu waa na sacajndooⁿâ 'o ndo' na ya to'ñoom'yo' jâ. Mati cwila'neiⁿna chiuu waa na jnda 'ndye'yo' na tyola't'maaⁿndyo' 'naⁿ na cwe' nn'aⁿ nl'a, ndo' je' naxeⁿ Ty'oots'om macwitsantyjo'yo'. Je' jnda macwindye'ntjom'yo' nnom nqueⁿ na wanoom'm, na macanda jom cwiluiiñê Ty'oots'om. ¹⁰ Mati cwila'neiⁿ naⁿñeeⁿ na cwimein'ndo'yo' na nncwjee'nnda' Jesús, Jnda Ty'oots'om na nnaaⁿ cañoom'luee, nquii na

tquiaaⁿ na wando'xco jnda na tue', nquii na macwji'n'maaⁿñe jaa na wi' na jeeⁿ cwajndii na quia nncwjee'cañoom.

Ts'iaaⁿ na s'aa Pablo Tesalónica

2 ¹ 'O nn'aaⁿya na cwila'yuyoyo', mancjo'ti'yo' nquiu'yo' na ticwe' ts'iaaⁿndyo na sacajndoo'â 'o. ² 'O manquiu'ya'yo' na jeeⁿ t'maⁿ jla'jnaaⁿ nn'aⁿ tsjoom Filipos jâ ndo' jla'sei'na jâ, saa meiiⁿ na luaa', xcwe xjeⁿ na tjooⁿyâ nawil'waa', tquiaa Ty'ooots'om na t'maⁿ n'ooⁿyâ na tquiaayâ ñ'oom ndaa'yo' cantyja na macwji'n'maaⁿñe añmaaⁿ nn'aⁿ. ³ Ee ñ'oom na cwiñequiaayâ cwiluiiñena' ñ'oom na mayuu', nchii ñ'oom na tijndaa'ya nquiuuyâ, ndo' nchii cwe' na ñe'cala'ntjaaⁿyâ nn'aⁿ, meiⁿ nchii na cwinquio'nn'aaⁿyâ nn'aⁿ. ⁴ Wandyo' waa cantyja 'naaⁿyâ, ee tjawee' ntyjii Ty'ooots'om ñ'eⁿndyô ndo' ty'ioom ts'iaaⁿ jâ na ñnequiaayâ ñ'oom na macwji'n'maaⁿñe añmaaⁿ nn'aⁿ. Nchii cwil'aayâ ts'iaaⁿñeeⁿ cha na nncjaawee' n'om nn'aⁿ ñ'eⁿndyô, saa cha nqueⁿ nncjaawee' ts'oom, ee jom nlqueeⁿ cwenta chiuu n'ooⁿyâ. ⁵ 'O manquiu'ya'yo' na tijoom ñe'jla'ca'naaⁿndyô ndaa'yo', meiⁿ nchii tqui'o'nn'aaⁿyâ 'o na nntjeii'â tsjo'ñjeeⁿ luee'yo'. Ty'ooots'om noom'm na ljo'. ⁶ Meii'jom ndii' tyool'uaayâ na nla't'maaⁿndye nn'aⁿ jâ, meiⁿ ndaa' 'o meiⁿ ndaa nt'omcheⁿ. ⁷ Jâ tyojndoo'â 'o ñequio na jnda nquiuuyâ ñ'eⁿndyo' cha'xjeⁿ cwii yuscu na jeeⁿ wi' ts'om ntseinda, ya cwenta mach'ee joona. ⁸ T'maⁿ waa na jeeⁿ wi' n'ooⁿyâ 'o, nchii tomti neiiⁿyâ na tyoñequiaayâ ñ'oom naya 'naaⁿ Ty'ooots'om ndaa'yo' saa mati chiuu waa na tyom'aaⁿyâ quii'ntaaⁿyo'. Luaa' waa nc'e na jeeⁿ jnda nquiuuyâ 'o. ⁹ 'O nn'aⁿya na cwila'yuyoyo' tyootsuu' n'om'yo' chiuu na tyola'jndaayayâ na nnta'ntjooⁿyâ na tcaⁿna' jâ. Naxuee natsjom tyol'aayâ ts'iaaⁿ cha tîcatiooyâ xuu nacjo'yo' na nnteixe'yo' jâ yochē na tyoñequiaayâ ñ'oom naya 'naaⁿ Ty'ooots'om ndaa'yo'.

¹⁰ 'O nn'aaⁿya na cwila'yuyoyo', manquiu'yo' ndo' mati mantyjii Ty'ooots'om chiuu ñet'ooⁿyâ quii'ntaaⁿyo'. Tyola'candaaⁿndyô jo nnoom na tyol'aayâ yuu na maty'iomyana' ndo' meicwii ts'aⁿ xondaa ntso na jla'tjooⁿndyô ndaa'yo'. ¹¹ 'O manquiu'yo' chiuu waa na ñet'ooⁿyâ quii'ntaaⁿyo' na tyom'aaⁿyâ cha'cwijom mach'ee ts'aⁿ ñequio ntseinda, ¹² tyolanaaⁿyâ ñ'oom ndaa'yo' na tyoñequiaana' na t'maⁿ n'om'yo', tyola'jndoo'â n'om'yo' na c'om'yo' cha'xjeⁿ na matsona' na c'om nn'aⁿ na maqueeⁿñe Ty'ooots'om na calajomndyena cantyja na matsa'ntjoom ndo' ñequio na matseit'maaⁿñena' jom.

¹³ Quia tyondye'yo' ñ'oom naya 'naaⁿ Ty'ooots'om na tyoñequiaayâ ndaa'yo' mana to'ñoom'yo' juuna'. Jo' na cwiñequiaayâ na quianl'uaaⁿaⁿ cantyja 'naⁿyo'. Ee jla'noⁿyo' na ñ'oom Ty'ooots'om juuna' nchii ñ'oom na cwe' cwila'tiuu nn'aⁿ. Ndo' mayuu' na jo' juuna'. Jo' chii cwiwitquioo' ts'iaaⁿ na mach'eeⁿ naquii' n'om' 'o na cwila'yuyoyo' ñ'eⁿñe. ¹⁴ 'O nn'aaⁿya, ljo'waayu ñetjom'yo' cha'xjeⁿ ñetjoom ntmaaⁿ

nn'aⁿ na macwji' Ty'o^ots'om cwentaaⁿaⁿ ndyuaa Judea. Ee nquiee nn'aⁿ tsjom'yo' ñeta'wi'na 'o cha'xjeⁿ tuui ndyuaa Judea, tyota'wi' nn'aⁿ judíos nc'iaana na cwilayu' ñequio Cristo Jesús. ¹⁵ Nn'aⁿ judíos'ñeeⁿ jla'cuae'na Ta Jesús, cha'xjeⁿ weloona tyola'cwjeena profetas ndo' mati jleintyo^o nn'aⁿ judíos já. Tiquil'ana yuu na cjaawee' ntyjeeⁿ ñ'eⁿndyena, ndo' m'aⁿna nacjoo cha'tsonde nn'aⁿ, ¹⁶ ee quia na ñe'calanaaⁿyâ ñequio nn'aⁿ na tachii judíos cha mati nnda^a nncwji'n'maaⁿñe Ty'o^ots'om joona, tiñe'quiandyena na nl'aayâ na ljo', ndo' na cwil'ana na luaa', cwila'cwaljoo'tina jnaaⁿna jo nnoom. Saa je' juu na jeeⁿ cwajndii na matseiw'eeⁿ nn'aⁿ mama t'uiina' joona.

Ñe'cjaacando'nnda' Pablo nn'aⁿ Tesalónica

¹⁷ 'O nn'aaⁿya, cantyjati xuee na tjei'na' já quii'ntaaⁿyo', meiiⁿ taconty'iaayâ 'o saa ñequii'cheⁿ cwijaañjoom' n'o^oyâ 'o chiuu cwitsam'aⁿti'yo'. Jo' chii jeeⁿ cwicantyyaa' n'o^oyâ na nntsaacajndo^onnda'â 'o. ¹⁸ Jeeⁿ ñe'catsaayâ na m'aⁿyo', majndeitiicheⁿ ja Pablo jndye ndii' s'aana' na ñe'cjo saa seitsaaⁿñe Satanás na nl'aayâ na ljo'. ¹⁹ ¿Ljo' jo' na ñnequiaana' na cwicantyyaa' n'o^oyâ jo nnom Ty'o^ots'om, ndo' na ñnequiaana' na neiiⁿyâ oo na nntantjo^oyâ jo nnoom? ¿Aa nchii ma'o jo'? Ee ma'o cwiluiindyoy' cha'tso nmeiⁿ na nntseit'maaⁿñena' ja jo nnom Ta Jesucristo quia na nndyonnaaⁿaⁿ. ²⁰ Nc'e 'o, jo' matseit'maaⁿñena' já ndo' mañequiaana' na neiiⁿyâ.

3 ¹ Quia tileicatseiquiiti ts'o^o na tjaa ñ'oom cantyja 'naⁿyo' seijndaa'ndyo na nljoo'ndyo na ñe'nnc^o tsjoom Atenas. ² Jo' chii jñooⁿyâ juu nn'aaⁿya Timoteo na m'aⁿyo', jom cwiluiiñê mosoo' Ty'o^ots'om. Matseijomñê ñ'eⁿndyô na cwiñe'quiaayâ ñ'oom naya 'naaⁿ Cristo. Tjacanoom'm 'o na ñnequiaaⁿ na t'maⁿ n'om'yo' ndo' na nnc'oom'jndeiⁿ n'om'yo' cantyja na jnda jla'yu'yo'. ³ Ee na l'ue n'o^oyâ na meiⁿcwiindyoy' 'o tintseilcwe'na' ts'om cwe' nc'e na wi' na cwitjom'yo'. Ee manquiu'yo' na maxjeⁿ mañequiaa Ty'o^ots'om na catjooⁿya nawi'meiⁿ. ⁴ Ee quia tyom'aaⁿyâ ñ'eⁿndyoy' t'mooⁿyâ ndaaⁿyo' na maxjeⁿ nncwinooⁿya nawi' ndo' jnda macwiluii naljo' cha'xjeⁿ na manquiu'yo'. ⁵ Nc'e na tileicwiquiiti ts'o^o, jo' chii jñooⁿya Timoteo na ncjacwax'eeⁿ aa ndicwaⁿ cwila'yu'ya n'om'yo' ñ'eⁿ Ty'o^ots'om ee nquiaya xeⁿ na aa jnda s'aa tsaⁿjndii na jla'tjoondyo' ndo' jo' nnts'aana' na cwe' ts'iaaⁿndyo ts'iaaⁿ na ñel'aayâ quii'ntaaⁿyo'.

⁶ Saa je' jnda jndyolcweeⁿeⁿ na ñet'oom Tesalónica ndo' jeeⁿ ya ñ'oom jndyoon'oom na cwilayu'ya n'om'yo' ñ'eⁿ Ty'o^ots'om ndo' na jnda nquiu'yo' já. Tsoom na ñequii'cheⁿ cwijaañjoom' n'om'yo' já ñequio na jnda nquiu'yo' ndo' jeeⁿ queeⁿ n'om'yo' na nnty'ia'yo' já cha'xjeⁿ ñe'canty'iaayâ 'o. ⁷ Jo' chii 'o nn'aⁿya, quii'ntaaⁿ cha'tso na matseijaa'ñena' nacjooyâ ñequio nawi' na cwiwinooⁿyâ t'maⁿ waa na mañequiaana' na t'maⁿ n'o^oyâ na cwiljoo'ndyoy'tyeⁿyo' na cwila'yu'ya

n'om'yo' ñ'eⁿ Ty'o^ots'om. ⁸ Ndo' na cwindyaayâ na cwiljoo'ndyo'tyeⁿyo' cantyja 'naaⁿ Ta Jesús, mach'eena' cantyja 'naaⁿyâ cha'cwijom na cwiluiindyoxcooyâ. ⁹ Meiiⁿ ncjooyâ tileicwijndaayâ na cwiñe'quiaayâ na quianl'uaa' Ty'o^ots'om cantyja 'naⁿyo'. Quianl'uaaⁿaⁿ na waljoo'cheⁿ na neiiⁿyâ jo nnoom cantyja 'naⁿyo'. ¹⁰ Naxuee natsjom cwitaaⁿyâ nnom Ty'o^ots'om na ñnequiaaⁿ na nnty'iaandaayâ 'o na nla'candaa'ndyotyayâ yuu na cwimatseitjoona' na cwila'yu'ya n'om'yo' ñ'eⁿñê.

¹¹ Cwitaayâ na nquii Tsotyayâ Ty'o^ots'om ñequio Ta Jesucristo cateijndeina jâ cha ndaa nntsaacajndoo'ndaa'â 'o. ¹² Mati cwitaayâ na cateijndeii Ta Ty'o^ots'om na nncjaaqiendyo' na m'aⁿyo' na wi' n'om'yo' cwii cwii ntyjee'yo'. Ndo' catseicwaljoo'tina' na wi' n'om'yo' cha'tso nt'omcheⁿ nn'aⁿ cha'xjeⁿ m'aaⁿ jâ na wi' n'o^oyâ 'o. ¹³ Quiaaⁿ na nleijndeii' n'om'yo' cha nla'xmaⁿyo' na lju' n'om'yo' na candaa'ndyo' jo nnom Tsotyayâ Ty'o^ots'om quia na nncwjee'nda' Ta Jesús ñequio cha'tsondye nn'aⁿ cwentaaⁿaⁿ.

Nmeiiⁿ cal'aaya cha nncjaawee' ts'om Ty'o^ots'om

4 ¹ Ndo' je' 'o nn'aaⁿya ñequio xuee' Ta Jesús cwitaayâ ndaa'yo' ndo' cwitsa'ntjooⁿyâ 'o na c'om'yo' cha'xjeⁿ na jnda t'mooⁿyâ na cal'a'yo' cha nncjaawee' ts'om Ty'o^ots'om ñ'eⁿndyo'.

² Ndo' manquiu'ya'yo' ñ'oom'ñeeⁿ na tquaaⁿtyaaⁿyâ ndaa'yo' ñequio najndeii na matseixmaⁿ Ta Jesús. ³ Ee luaa waa na l'ue ts'om Ty'o^ots'om ñ'eⁿndyo' na calaxmaⁿyo' na lju' n'om'yo' cantyja 'naaⁿaⁿ meiⁿ tanc'om'ya'yo' ñequio nn'aⁿ na cwe' luaa', ⁴ ticwiindyoy' 'o nn'aaⁿya, cala'nqⁿyo' na l'ue ts'om Ty'o^ots'om na c'om'yo' na yandyo' ñequio lcuu'yo', ndo' na cala't'maaⁿndyo' joona, ⁵ nchii nnc'oom tsaⁿs'a ñequio scoom'm na ncwinom'na' ljo' mach'eeⁿ na tia na matseitioom ñ'eⁿñe cha'xjeⁿ cwil'a nn'aⁿ na tic'om nacje 'naaⁿ Ty'o^ots'om. ⁶ Meiⁿcwii tsaⁿs'a tintseitjoone nnom x'iaa' na nnc'oomya ñ'eⁿ scuu' tsaⁿñeeⁿ meiⁿ tinquiu'nn'aⁿ cantyja 'naaⁿ ñ'oommeiⁿ ee jeeⁿ t'maⁿ na wi' nntseiquioo Ta Jesús nacjoo' ts'aⁿ na mach'ee cha'tso nmeiⁿ cha'xjeⁿ na jnda ñejla'candiiyâ 'o. ⁷ Ee nchii na tqueeⁿñe Ty'o^ots'om jaa na nlajomndyo cantyja 'naaⁿ natia, saa jom l'ue ts'oom na c'o^oyâ na lju' n'o^oyâ jo nnoom. ⁸ Cwe' jo' xeⁿ m'aaⁿ ts'aⁿ na ticuee' ts'om ñ'oommeiⁿ na cwit'mooⁿyâ ndaa'yo', catsei'nqⁿ tsaⁿñeeⁿ na nchii cwe' ñ'oom na tqueⁿ nn'aⁿ mach'ee na til'ue. Juu mach'ee na til'ue ñ'oom na tqueⁿ nquii Ty'o^ots'om, na jom tquiaaⁿ Espíritu Santo naquii' n'o^oyâ.

⁹ Cantyja 'naaⁿ na c'om'yo' na wi' n'om ntyjee'yo' na cwila'yu', tacaⁿna' na cwinntseiljeiya ñ'oom'ñeeⁿ ee manquiiiti Ty'o^ots'om ma'mooⁿ ndaa'yo' na c'om'yo' na wi' n'om'yo' joona. ¹⁰ Ee 'o wi' n'om'yo' nn'aⁿ na cwila'yu' na m'aⁿ ts'ondaa Macedonia. Saa cwitaayâ ndaa'yo' na c'om'yo' na mat'maⁿti na wi' n'om'yo' joona. ¹¹ Calajnda'yo'

na tjoom' ñ'oom nnc'om'yo' ñ'eⁿ nc'iaa'yo'. Tacatii'ndyo' ñ'oom 'naaⁿna na ticatseixmaⁿna' na nla'jomndyo'. Cjoo' n'om'yo' na cal'a'yo' ts'iaaⁿ 'naⁿyo' cha'xjeⁿ ñ'oom na jnda tquaaⁿtyaaⁿyâ ndaa'yo', ¹² ee na nl'a'yo' na ljo', nn'aⁿ na tyoola'yu' nla't'maaⁿndyena 'o meiⁿ xotseitjoona' 'naⁿ na nleil'uee'ndyo'.

Cantyja na ndyonnda' Ta Jesucristo

¹³ Ndo' je' 'o nn'aⁿya, tacal'ue n'ooⁿyâ na mati ticala'noⁿyo' chiuu nnts'aana' ñequio nn'aⁿ na jnda tja meiⁿ tanc'om'yo' na chjoo' n'om'yo' cha'xjeⁿ nt'omcheⁿ nn'aⁿ na tintyjaa' n'om Ty'oots'om. ¹⁴ Ndo' cha'xjeⁿ cwila'yuu'a na tue' Jesús ndo' na tando'xcoom, maluaa' cwila'yuu'a na cantyja 'naaⁿ jom ñnequiaa Ty'oots'om na joo nn'aⁿ na jnda tja na ñejla'yu' ñ'eⁿñê nnta'ndo'xcona.

¹⁵ Jo' chii cwil'uuyâ ndaa'yo' ñ'oom na t'moⁿ nquii na cwiluiiñe na catsa'ntjom jaa na ndicwaⁿ cwitandoo'a hasta xjeⁿ na ndyonnaaⁿaⁿ, xocwinooⁿa nn'aⁿ na jnda tja. ¹⁶ Ee manquiti Jesús nnaaⁿ cañoom'luee, jndeiⁿ ñ'oom na nntsa'ntjoom, ndo' ndyocueeⁿ, xjeⁿñeeⁿ nleic'uaa jndyee' ángel na cwiluiitquieñe ndo' mati ndu 'naaⁿ Ty'oots'om. Quia jo' joo nn'aⁿ na jnda tja na ñejla'yu' ñ'eⁿ Jesús, joona najndyee nnta'ndo'xcona. ¹⁷ Jnda jo' jaa na ndicwaⁿ cwitandoo'a xjeⁿñeeⁿ ñe'naaⁿ nncjaachuuna' jaa ñ'eⁿndyena quii' nchquiu na nntjomndyo ñequio Ta Jesús quii' jndye ndo' nnc'ooⁿtyaaⁿya ñ'eⁿñê. ¹⁸ Jo' chii ñequio ñ'oommeiⁿ quia'yo' na t'maⁿ n'om nn'aⁿyo' na cwila'yu'.

5 ¹ 'O nn'aaⁿya, cantyja 'naaⁿ cwaaⁿ xuee oo cwaaⁿ xjeⁿ na ndyonnda' Ta Jesús, meiⁿ ticaⁿna' na nntseiljeiya. ² Ee manquiu'ya'yo' nncue'ntyjo xuee na ndyonnda' Ta Jesús xjeⁿ na tic'om c'ee nn'aⁿ na nluii na ljo'. Matseijomna' cha'na quia na macwjee' tsaⁿnch'ue. ³ Xcwe xjeⁿ quia cwilue nn'aⁿ: “Je' tjaa'naⁿ tia', tjaa'naⁿ na teincuu”, majuu xjeⁿñeeⁿ ñejomto nquiao nawi' t'maⁿ nacjoona cha'xjeⁿ quia na manaⁿna' na maquiina' yuscu na manntseincuii, meiⁿ tjaa'naⁿ na cwii ndaaⁿ ndyaandye nn'aⁿ juu nawiñeeⁿ. ⁴ Saa 'o nn'aⁿya, ticalaxmaⁿyo' cantyja 'naaⁿ na jaaⁿñe, jo' chii juu xuee na nncwjee'nnda' Ta Jesús xocatseijomna' juuna' cantyja 'naⁿyo' cha'na quia na nncwjee' tsaⁿnch'ue waa' ts'aⁿ. ⁵ Jaa la'xmaaⁿya cantyja 'naaⁿ naxuee. Tila'xmaaⁿya cantyja 'naaⁿ natsjom oo cantyja 'naaⁿ najaaⁿñe. ⁶ Jo' chii maty'iomna' na c'ooⁿya na wando' n'ooⁿya ndo' queⁿndyocheⁿncjooya xjeⁿ cantyja 'naaⁿya jo nnom Ty'oots'om. Ee ticatsona' na c'ooⁿya cha'cwijom na cwindaaⁿya cha'na nt'omcheⁿ nn'aⁿ na tyoola'yu'. ⁷ Ee nn'aⁿ na cwindaa, natsjom cwindana, ndo' nn'aⁿ na cwicandye, natsjom cwindyena, ⁸ saa nc'e na cwilaxmaaⁿya cantyja 'naaⁿ naxuee, cwa queⁿndyocheⁿncjooya xjeⁿ, cha'waati xuee c'ooⁿya cha'na ts'aⁿ na candaa' xqueⁿ. Matsona' na cata'ñoom'ndyo cheⁿncjooya ñequio na cwilayu'ya n'ooⁿya ñ'eⁿ Ty'oots'om ndo' ñequio juu na

m'aaⁿya na wi' n'ooⁿya nn'aⁿ ñequio juu na ntyjaa' n'ooⁿ na nncwji'n'maaⁿñe Ty'oots'om añmaaⁿya cha'xjeⁿ mawañoom' tjaⁿxqueⁿxjo xqueⁿ sondaro. ⁹ Ee nchii seijndaa'ñe Ty'oots'om na nnt'uiityeeⁿ jaa naquii' nawi' t'maⁿ. Saa tqueeⁿ jaa na nndaaya na nlui'n'maaⁿndyo nc'e nquii Ta Jesucristo. ¹⁰ Jom tueeⁿeⁿ cwentaaⁿya cha tjoom' na nntando^o'a ñ'eⁿñê quia na nndyonnaaⁿ'aⁿ, meiiⁿ na ndicwaⁿ tando^o'a ndo' meiiⁿ na aa jnda tjaaya. ¹¹ Jo' chii cwii ndo' cwiindyo' quia'yo' na t'maⁿ n'om ntyjee'yo' na nc'oonajndana cha'xjeⁿ na cwil'a'yo'.

Ñ'oom na matseijndo' Pablo n'omna

¹² 'O nn'aⁿya, cwitaaⁿyâ na cala'tmaaⁿndyo' nn'aⁿ na cwil'a ts'iaaⁿ 'naaⁿ Ty'oots'om quii'ntaaⁿ'yo' na cwijndoo'na ts'iaaⁿ 'naaⁿ'aⁿ ndo' na cwila'jndo'na n'om'yo'. ¹³ Maty'iomna' na cala't'maaⁿndyo' naⁿñeeⁿ ñequio na jnda nquii'yo' joona, ee joona jeeⁿ cwila'jndana naquii' ts'iaaⁿwaa'. C'om'yo' na tjoom' ñ'oom ñequio nc'iaa'yo' na tjaa ndia' cacho'yo' ñ'eⁿndyena.

¹⁴ Ndo' cwila'jndeii' ndyuaayâ ndaa'yo' 'o nn'aⁿya, na cala'tia'yo' nn'aⁿ'yo' na tiñe'cal'a ts'iaaⁿ. Quia'yo' na t'maⁿ n'om nn'aⁿ na leic'om t'maaⁿndye n'om. Cateijndeii'yo' nn'aⁿ na tijndana na tila'yu'ya n'omna. C'om' nioomcheⁿ n'om'yo' ñequio cha'tsonde nn'aⁿ.

¹⁵ Xeⁿ tis'a cwil'a nn'aⁿ 'o, cal'andyo' cwentaaⁿ na tinl'a'yo' wi' joona. 'O xuii' cal'a'yo', 'o ñequii'cheⁿ cal'a'yo' yuu na ya ñ'eⁿ nn'aⁿ, meiiⁿ mancjo'ti'yo' oo meiiⁿ ñ'eⁿ meiiⁿquia ts'aⁿ.

¹⁶ Ñequii'cheⁿ c'om'yo' na neiⁿnco n'om'yo'. ¹⁷ Tintsawi'ntyje'yo' na cwilaneii'yo' nnom Ty'oots'om. ¹⁸ Cha'tso na mach'eena' ñequiondyo' quia'yo' na quianl'uaa' Ty'oots'om ee luaa' l'ue ts'oom ñ'eⁿndyo' 'o na cwila'yu'yo' ñ'eⁿ Cristo Jesús. ¹⁹ Tila'tsaaⁿndyo' ts'iaaⁿ na mach'ee Espíritu Santo quii'ntaaⁿ'yo'. ²⁰ Joo ñ'oom na cwiñequia nn'aⁿ na ma'moⁿ Ty'oots'om ndaana, til'a'yo' na ticuee' n'om'yo' ñ'oomñeeⁿ.

²¹ Cha'tso ñ'oommeiⁿ catjei'yo' cwentaaⁿ aa xcwe joona', ndo' ñ'oom na cwiwitquiao' na xcwe, caljoo'ndyo'tyeⁿ'yo' ñequio joona'.

²² Cala'tquiio^o'ndyo' ñequio cha'tso nnom natia.

²³ Manquiiti Ty'oots'om, nqueⁿ na mañequiaaⁿ na tjaa ñomtiuu m'aaⁿ ts'aⁿ jo nnoom, jom queⁿñooⁿ 'o na candaⁿ'ndyo'. Cwañom'm cha'waa espíritu 'naⁿ'yo', ñequio añmaaⁿ'yo' ndo' seii'yo' cha caljoo' joona' na meiiⁿcwii jna' tilaxmaⁿ'na' hasta xjeⁿ na nncwjee'nda' Jesucristo na cwiluiñê na matsa'ntjoom jaa. ²⁴ Nquii Ty'oots'om na macwaaⁿ 'o cwiluiñê na mayom'm, maxjeⁿ nntseicanaaⁿ cha'tso nmeiⁿ cantyja 'naⁿ'yo'.

Cwiñequiana na xmaⁿndye nn'aⁿ

²⁵ 'O nn'aaⁿya ñequii'cheⁿ calaneiⁿ'yo' cantyja 'naaⁿyâ nnom Ty'o^ots'om.

²⁶ Quia'yo' na xmaⁿndye cha'tso nn'aaⁿya na m'aⁿ ñ'eⁿndyo' na cwitaⁿ'yo' lueena.

²⁷ Ñequio na jndeiⁿ ts'iaaⁿ na matseixmaⁿya na tquiaa Ta Jesucristo matio^oya xuuwaañe nacjo'yo' na cala'naⁿ'yo' cartawaa na ndye cha'tson^ondye nn'aaⁿya na cwila'yu'.

²⁸ Nquii Ta Jesucristo cwentaaya quiaaⁿ na nla'xmaⁿ'yo' naya na matseixmaaⁿ.